

Tico Croes ta señala **Dos miembro di comision pa Independencia a bay haci viahe**

ORANJESTAD(AAN) -- Tico Croes a duna di conoce na DIARIO cu dos miembro di Comision pa Independencia a bay haci un viahe rond di mundo pa studia independencia.

Ta trata aki di Mario Croes y Stanley Morales kendenan segun Croes a viaha pa Merca, Canada, Inglatera etc.

E comision a worde instalá na

Ministro Hendrik Croes. Croes a señala cu Mario Croes y Stanley Morales ta haciendo un viahe rond mundo pa studia e aspecto di gemenebest.

AVP ta kere cu ta hopi remarkable cu nan ta sali justamente awor cu ta reina un confusion asina grandi den seno di Gobier, no tocante di e asunto di futuro structura estatal di Aruba.

AVP a comprende cu algun siman pasa Rudy Croes a declara enfáticamente den un discurso na Quito, Ecuador, den seno di e

congreso di socialista internacional, a declara cu ta inacceptable un relaciona a base di derecho estatal cu Hulanda. Cu otro palabranan, solamente un independencia ta aceptable pa partido MEP.

Awor, mester compronde cu e palabranan a sali for boca di Rudy Croes cu e unico peso grandi cu e tin den MEP ta su 4700 voto y ta pesey tambe mester tene bon na cuenta awor aki cu Rudy Croes ta papia ariba aspectonan aki pasobra e tin 4700 voto su tras.

Mientras cu e ta bisando esey, te ainda no a haya un claridad kico exactamente Gobierno kier pa motibo cu e lider di su partido tin un silencio hermetico.

AVP ta haya cu a bira tempo cu Nelson Oduber mester papia y bisa cu si ta enberdad loke Rudy Croes a bisa cu ta un independencia so ta aceptable pa MEP, cu si enberdad esey ta loke su Gobierno kier.

Croes a mostra cu di otro banda a tende cu e impresion ta worde crea cu MEP tambe lo tin otro punto di vista pasobra Richard Eman awor ta papia di statuut etc.

Kiermen ta evidente cu tin un confusion grandi, cu enberdad tin dos coriente den e partido y

pa e lider di partido ta yega momento awor aki cu e mester papia y bisa na placa chiquito kico precisamente MEP kier y kico e Gobierno kier.

Ta straño cu mientras cu e confusion aki ta reinando, ta sali dos ambtenaar ariba custia di pueblo pa bay haci un estudio den exterior pa duna sosten na e punto di vista di e grupo di MEP cu kier un independencia.

Mas straño ainda ta cu diferente miembro di e comision, segun AVP tin entendi, no ta na haltura mes di e viahe aki. Esaki ta falta di seriedad completo di e comision aki. AVP su punto di bista ta cu e comision aki mester worde aboli y na su lugar mester bin un comision cu

enberdad ta reflehá tur e forzanan politico na Aruba, tur e gremionan y organizacionnan pa asina scoge ariba e mihor forma di e futuro relacion cu Hulanda.

Segun Croes, AVP no por acepta cu di awor aki caba, sin cu pueblo a papia, sin cu pueblo a scoge, Gobierno ta sigui duna contenido na independencia door di manda dos ambtenaar bay haci un estudio.

AVP ta rechaza esaki rotundamente y cu Nelson Oduber mester bin padilanti y bisa si enberdad e ta para tras di palabranan di Rudy Croes cu a bisa cu independencia ta e solucion pa Aruba, of si Oduber ta kere cu Status Aparte tambe ta un opcion pa Aruba.